

Kaiwo Anatu Reantenang Na Yohanesi

Kaiwo dedung we 1 Yohanesi

Na suratinei Yohanesi soi kariri fi beru we inontarai eroasoa fosa. Fi reantenang mani, soi kariri inontarai etaunau kaiwo mai kaha fosa. Etaunau we Yesusi mani wiro Mananu Mampariri da to nunei ma weinontarai batang kaha, mae da wenuaninu terai.

Deretawansa we wiro era riasa tuti etohong kariri ene aunaufo fanai. Weo nana mani ambori wedaya eroaso Mananu Kristusi ahang kaha ki. Yohanesi deikaririai wesa kariri todoni deti te Yesusi tuti yu teri na warangfo kontai, tuti deikaririai we Yesus Kristusi da weinontarai batang tarai ma.

Fi beru soi kontaifa mani, deretawanai we ambori inontarai eroasoa fosa enemiwawu waweraha tuti eweboyari ria Allai tuti ne Kaisungno Yesus Kristusi.

Kaiwo na suratinei deto kutuai tonina:

1:1-4 Kaiwo reantenang.

1:5-2:29 Sambewarai tuti mamantiti.

3:1-24 Arikang Allai fosa tuti arikang Saminseni fosa.

4:1-6 Ne wetaraifo tuti ne sarawafo.

4:7-21 Fi kariri todoni enemiwawu waweraha fo.

5:1-21 Inontarai yoaso Allai tarai foi ambori sobu numainufo.

*Kaiwo kariri Seng Yesus Kristusi manoarang
wefitawafa foi*

¹ Itoi kaiwone we mea kariri mano niayai kawuru na reantenang pari foa foi, amani mano ametaramioi terai we medu, mano amewatioi terai na ameureminei, mano mantaung amea amesairi terai tuti ameru teri na amewaramine. I mani, Yesus Kristusi dine, mano ahui weKaiwoariri deinawiai we tata todoni tatarang na tarai, amani taminohi kariri Allai ne dawiafo. ² Allai deinawi mano dohong inontaraine tata tatarang foi we amea, tuti amewatioi, ampefe amemadurai tuti amewuwuai we mea weo mano amewatioi foi mani, mano arang ao werea na wea kaha foi dine. I mani weriria Dai Allai tuti Allai deinawi we amea. ³ Amewuwu kaiwoariri kariri mantauni, mano amewatioi tuti ametaramioi nani we mea, ambori meweboyari ria amea ki. Kontai tata mani, taweboyari ria Dai Allai tuti ne Kaisungno Yesus Kristusi. ⁴ Kariri finanai kiai ametoi kaiwonei we mea mau, ambori taenemirorongnei mirising beyari.

*Todoni kontai tamararebanai, weo Allai yuai
rurang tane sasarifi ampa*

⁵ Amemadurai tarai we mea kariri kaiwo ametaramioi ria Yesus Kristusia fo, amani: Allai mani Sambewara dine. Wiro mamantiti kuteai nai na I kaha, nana mani neo fi sarawa kuteai konta kaha. ⁶ Masino tamadu tateyo taweboyari riati, wape tanayai na manantiti rorong fo, nana mani tawenggari, tanari sasari pampang tuti tanari fi wetarai fo kaha. ⁷ Wape masino tanayai na sambewara rorong fo ne tarai kariri Allai we niayai na sambewara rorong fe fo, nana mani

taminohi wau taweboyari, tuti Allai ne Kaisungno Yesusi yuai rurang tata weru tane sasarinei kiai na ne rikao tiwowu we tata foi.

⁸ Masino tateyo tanari sasari kaha, nana mani tatatofa bera mantaung tata tuti kaiwo wetarai na Allai fo niayai na tata kaha. ⁹ Mae tateairai we tatohong sasari, nana mani ambori dohong kariri ne kaiwo arera fo we tata tuti niari ne maifo, amani deiai tane sasarinei tuti yuai rurang tata weru fi sarawai kiaio tanari fo. ¹⁰ Wape tateyo tatohong pari sasari, nana mani toyari tateyo Allai pempamu, tuti wiro tasoni ne Kaiwofo na taenemirorongnei kaha.

2

Yesusi feriri tata ampafe tanari kariri Allai ne Kaiwofo

¹ Nehu arikang enehuwawu mea wa meaine, itoi kaiwone we mea mau we yeretawang mea ambori menari sasari fanai. Wape masino mane nari sasari mani, tane mangfata mansiari, andino medu pampang tuti tata na Dai Allai arongreafo ne, amani Yesus Kristusi. I mani mano mesi paria dine. ² Andino mireha we feriri tata ambori Allai deiai tane sasarinei. Tuti wiro tameiri tata kaha, mae kaiwasa fuba nunei kiai ne sasarinei kontai.

³ Tatohong kariri Seng Allai ne kaiwo pondoaia fo mani deinawiaifa we tataroani finana. ⁴ Ampafe mandoni dino medu deyo, “Yeroanso Allai,” wape wiro dohong kariri ne kaiwo pondoaia fo kaha mani, inontarai nani pempamu tuti Allai ne kaiwo wetarai medura fo niayai nai kaha. ⁵ Wape mandoni dino dohong kariri ne

kaiwo medura fo na mai mani, wenani enewawu Allai na mai, kariri Allai enewawu tata. Na tonanane tawaitawanai we taweboyari ria Allai finana. ⁶ Mandoni dino deyo weboyari ria Allai mani todoni kontaio da kariri Kristusi, mano dohong kariri fi tamanai medura fo, ne wawua sahara fo.

Taenemiwawu wawera tata weo tanayai na sambewara rorong ne fefe

⁷ Maniwowirio enehuwawu mea wa meaine, kaiwo itoi mau we ohong kariria ninai, amani kariri menemiwawu wawera mea, wiwo kaiwo waworu arahio metarami tantumarai nina kaha. Mae kaiwo nanai waroia metaramioai ampa, amani na reantenang meroaso Kristusi fo. ⁸ Tonanai ki, wape kaiwo itoi mau ninai waworu kontai, we ne wetaraifo watioai na Kristusi mantauni tuti na mea. Weo na metohong kaririai nanai mamantitifi niai ampa tuti sambewarai tarai fi sambewarai kawuru ampa.

⁹ Ampafe mandoni dino deyo niayai na sambewarai rorong fo, wape enerireu ne doroifofo mani, wenani niayai na mamantiti rorong fo nendai. ¹⁰ Mae mandoni dino enewawu ne doroifofo mani, niayai na sambewarai rorong fo tuti wedayari sawai to sasari rorong fo kaha. ¹¹ Wape mano enerireu ne doroifofo mani niayai na manantiti rorong fo tuti ne tarai toyari da na manantiti rorong fo ampafe serawera datoai, pariao sodai karira, weo deitawangno Yesusi ne aunafo kaha fefe.

Itoi we mea weo Allai yuai rurang mene sasariwai tuti weo meteiyaya Saminseni fefe

12 Itoi we nehu arikang enehuwawu mea wa mea,
 weo na Kristusi wonongfo,
 Allai deiai mene sasariwai ampa.

13 Itoi we Dai mea,
 weo metaroanso Yesusi,
 mano niyai kawuru na reantenang pari
 foia foi.

Itoi we bariboaiwa mea,
 we meharai kobu Saminseni,
 metoaria mutu.

Itoi we nehu arikang enehuwawu mea wa mea,
 weo metaroanso Dai Allai ampa.

14 Itoi we Dai mea,
 weo metaroanso Yesusi,
 mano niyai kawuru na reantenang pari
 foia foi.

Itoi we bariboaiwa mea,
 weo mewemambiriu na mene meroasoawa,
 tuti Allai ne Kaiwone nayai na mene-
 mirorongwai,
 tuti meharai kobu Saminseni.

Menemirorongwai dohong we finunei fanai

15 Dohonao menemirorongwai dohong we
 nunei tuti fi kerira niai nai foi fanai, weo
 mandoni dino enewawu nunei mani, enewawu
 Dai kaha. 16 Weo fianggeng fuba na nunei, amani
 fi inontarai eharira fosa enemirorong dohong
 wea fo, fio euremifo nayai nai fo, tuti todoni efiai
 berasa tuti ene fianggengfoi, finanai kiai wiro
 na Dai ma kaha, mae na nunei. 17 Tutio nunei,
 kontai fi fuba inontaraine enemirorong dohong
 wea fo, ambori wioru ki. Wape inontarai mano
 etohong kariri Allai ne dawiafo, ea mani eminohi
 wenumainu.

Fi kariri Kristusi ne aitetafosa tuti ene aunau wetarai kaha fo

¹⁸ Arikang enehuwawu mea wa meaine, rahida nunei werea nai fi kikeu ampa. Tuti metaramioai kawuru ampa we inontarai mano weaiteta fuba we Kristusi nei ambori da ma ki. Kontai ninaia mani inontarai efau eweaiteta we Kristusi era kawuru ma ne. Finanai kiai deinawiai we rahidafe kikeu ampa. ¹⁹ Mano eweaiteta we Kristusi nanisa mani, raminde nanai ehontai tata, wape ninaia mani era to boriai weru tata ampa, weo enemirorongfoi wiro weboyari ria tata tarai kaha. Eweboyari ria tata tarai fea reti wiro era to boriai weru tata kahai ki. Wape, na tonanane deinawiaia kasau we na ea mani, mansiari kontaio wiro weboyari ria tata tarai kaha.

²⁰ Wape mea mene tarai toyari ea kaha, mae mea kiai Allai sensoni mea na Nuaninu Mirarebana fi ampa, amani mesobuai ria Yesusi mano mirarebana foi. Nanai wedaya metaroanso aunau wetarai fenina na menemirongwai.

²¹ Itoi kaiwone we mea mau ninai weo mewartawang Allai ne kaiwo wetarai kariri Yesusi fo ampa, wiro meserawaweraha kaha. Tuti mewartawanaifa kontai we kaiwo tatofa fo kuteai kontaio wiro obuai na aunau wetarai na Allai fo kaha.

²² Yeisaharai we mea aha, kariri mano eweaiteta we Kristusi nanisa, mano etatofa biriu nesa mani, mano eteyo Yesusi wiro Mananu Mampariri Allai dereri fi dine kaha. Inontarai tonana nesa mani eweaiteta we Kristusi, efafora Dai Allai tuti eteyo Yesus Kristusi wiro Allai ne Kaisungfi dine kaha. ²³ Weo mandoni dino fefora

ne Kaisungfoi mani wiro weboyari ria Dai kaha. Mae mandoni dino yoa we Yesusi mani Allai ne Kaisung dine, nana mani weboyari ria Dai Allai kontai.

²⁴ Ampafe fianai aino metaramioai na reante-nangfo, kariri todoni mesobu mai we meroaso Kristusi wa, metararatai nariai na menemiro-rongwai. Weo kaiwo nanai nayaia mutu na menemirorongwai mani, meweboyari ria Kaisungfoi tuti ria Dai Allai. ²⁵ Tuti kaiwo dereraio mantauni deretawani we tata fo, amani taminohi tatarang wenumainu.

²⁶ Itoi kaiwo ninai kiai we mea, we yeretawang mea kariri inontarai erurai we etatofa mea, eteyo Yesusi wiro Mananu Kristusi dine fo kaha, ambori metau wesa fosa. ²⁷ Wape we mea mani, Kristusi sensoni mea na Nuaninu Mirarebana fi ampa tuti Nuaninu Mirarebanai nani niayai pampang na meawa, ampafe wepararu inontarai siai etaunau mea ahang kaha. Weo Allai ne Nuanunu Mirarebana foi deunau mea kariri fifiani kontai. Tuti ne kaiwo nanai kaiwo wetarai fine, wiro sofa kaha. Ampafe todoni kontaio metohong kaririai, amani meweboyari ria Kristusi.

Meweboyari ria Yesusi ambori memamaya na rahida daraberahi ma foi kaha

²⁸ Ampafe arikang enehuwawau mea wa meaine, meweboyari ria Kristusi pampang, ambori daraberahi aha ma mani, wiro tamatai tatadiwa kaha, mae tatoari na arongreafo na tamamaya kaha. ²⁹ Masino mewaitawanai we Allai mani mesi, nana mani mewaitawanai

kontai we mandoni dino niari ne maifo mani, Allai yiwang enerorongfoia weworu ampa.

3

Allai ne arikang di mea, ampafe dohonao meraria mano eweanggari mea we menari sasari fosa fe

¹ Allai enewawu tata paria, wirowo tatatoafonsoa kaha. Enewawu tata tonanai doni sahu tata we ne arikang. Tuti tarai, tata mani ne arikang di tata! Wape kaiwasa nunei wirowo etaroanso tata we Allai ne arikang di tata kaha, weo wirowo etaroanso Allai kaha fefe. ² Ampefe maniwowirio enehuwawu mea wa meaine, na ninaifa tawaitawanai we tata mani Allai ne arikang di tata. Wape tawaitawang turu tane tarai toa fo na rahida fuiwana kaharai. Tonanai ki, wape tawaitawanaifa we Kristusi daraberahi aha ma mani, ambori tane tarai kariri mantauni ki, weo na rahida bonani tawati teri na tauremireane. Ninaia mani tawatioi kaha weo tane tarai kariri i kaharai. ³ Ampefe mandoni kontaio enemitawang ne tonanafo mani, ewaitawang weduasa ambori etohong sasari kaha, tuti enemirorong mesi, mai kariri Kristusi enerorongfoi wemesifo.

⁴ Mandoni niari sasari pampang ne mani, weni dohong sara Allai neo Hukumi dohonai we Musai foi. Weo tarai we ohong sasarinei kiai, nana mani ohong sara Allai ne Hukumifo finana.

⁵ Mewaitawanaifa we Kristusi da ma weo feriri inontaraine tane sasarinei, tuti mantauni mani wirowo dohong sasarifei kaha. ⁶ Mandoni kontaio weboyari ria Kristusi mani, wirowo niari sasari pampang kaha. Mae mandoni dino niari sasarifo

pampang mani, wenani wirowi deti Kristusi na wea kaha rai ete deroansoi kaha rai.

⁷ Nehu arikangwa meaine, mandoni kontaio dohonao metuati we weanggari meara ambori menari sasarifo fe. Mandoni dino dohong kariri ne maifo mani, i mani inontarai mesi dine, ne tarai kariri Kristusi wemesi fo. ⁸ Wape mandoni dino niari sasarifo pampang mani, wenani Saminseni ne arikang dine, weo Saminseni niari sasari na reantenangfo paria sobu nina fefe. Tuti Allai ne Kaisungno Yesusi da kawuru to nunei ma we niari kanggung fifianai aino Saminseni niari fo ao woru.

⁹ Mandoni saino Allai yiwang enemirorongfoia weworu kawurua mani, wirowi enari sasari pampang ahang kaha, weo ea mani ene tarai toyari tamanai, amani Dai Allai mantauni. Tuti enemirorong dohong we enari te ne maifo, weo Allai ne arikang saine fefe. ¹⁰ Fininai we ambori aroansoi kariri Allai ne arikangnesa tuti Saminseni ne arikangnesa: Mandoni dino dohong kariri Allai ne maifo kaha tuti enewawu ne dorofosa kaha, nana mani Allai ne arikang dine kaha. Na tonanane tawaitawanai we mandoni dino Allai ne arikangfoi ne tuti mandoni dino Saminseni ne arikangfoi ne.

Yesusi feriri mea ampa ampafe menemiwawu wawera mea

¹¹ Na reantenang meraria Yesusi fo, metaramio kaiwo dotu tonina: Todoni kontaio taenemiwawu wawera tata. ¹² Wirowi tane tarai kariri Kaini*

* **3:12** Kaini mani Adami ne arikang dine, wape Saminseni wedayari miung ne tahatui Habeli (Kejadian 4:8).

fanai, we i Saminseni ne arikang dine, donio miung ne tahatui tera foi ninai. Tuti we fiani niari tonana? Weo fianai aino niari fo, fi sarawa fine tuti fianai aino ne tahatuifo niari fo fi wetarai fine, ampafe enerorong pirahai wei nina. ¹³ Ampafe doroi meaine, inontarai nunesa enemireu mea mani, dohonao mepapuhing fanai.

¹⁴ Tawaitawanaifa we takaharai weru marareha rorong fe ma tanayai na numainufe ampa, weo taenemiwawu tane doroinesa fefe. Mandoni dino enewawu kaha mani, inontarai nani mararehafoi yutawani. ¹⁵ Mandoni dino enerireu ne doroihoi mani, wenani wemiung inontarai dine, tuti mewartawanai we inontarai tonana nei wiro sobu numainufo kaha. ¹⁶ Yesus Kristusi dohong ne taraihoia mireha we tata. Na tonina ne tawaitawang kariri todoni taenemiwawu inontarai siai fo. Ampefe tata kontai tatohong tane tarainei we tane doroihosa pariao tamarareha wesa kontai ki. ¹⁷ Toyarine mano ne ra bitoya manei, detio ne doroihoi ne pari fi, wape wiro aroi tuti fiatari kaha, nana mani na rang fianie deyo enewawu Allai nina? ¹⁸ Arikang enehuwawu mea wa meaine, dohonao taenemiwawu arora na taboromirawane fe. Mae todoni kontaio taenemiwawu na tatohong toa fo tuti na tarai.

Tamai we tatoari na Allai arongreafo

¹⁹⁻²⁰ Tawaitawanai we Allai ne arikang di tata tuti tanari kariri ne kaiwo wetarai fo. Tuti masino taaromio fi karira kiaio raminde nanai tanari fo tuti taenemirorong ketui fuisi dinggai tata kaririai

ki, wape taweansarai wea kaha, mae tanumiru-ainso tamai tuti tamainenang we tatoari na arongreafo. Weo Allai wemambiriu sewa taenemitituaitafo kiai. Tuti fifiani kontai deitawanaifa ampa tuti dohong tata tanumiruainso ne maifo.

²¹ Maniwowirio enehuwawu mea wa meaine, masino taenemirorong ketui fuisi dinggai tata kaha, nana mani tamatai kaha we takahefang we Allai. ²² Tuti fianai aino tatutani wea fo, tasobuai riati, weo tatohong kariri ne kaiwo medurai we tatohong kariria fo na mai tuti tanari te fi eneofo fefe. ²³ Tuti kaiwo medurai we tatohong kaririai fa nana mani, ainina: Todoni kontaio taroaso ne Kaisungfoi, amani Yesus Kristusi, tuti taenemiwawu wawera tata, kariri kaiwo medurai kawuru we tataro fo. ²⁴ Mandoni dino dohong kariri te ne kaiwo pondoai fo, nana mani weboyari ria Allai tuti Allai weboyari riati. Tuti tawaitawanai weo i weboyari ria tata na finina, amani dohongno Nuaninu Mirarebana foi we deinawi kaiwo Yesusi medura fo we tata fefe.

4

Aunauo metaramioa fo, metitua weai, weo na Allai Nuaninufoi ete na Saminseni

¹ Maniwowirio enehuwawu mea wa meaine, nabi tarai kahai bitoyao etatofa we ea mani nabi disa fesa, era wariyai mai katitaife kawuru mau wa etaunau fi wetarai kaha. Tonana mani dohonao meroaso funong inontarai emadu eteyo, ea mani inontarai emadu na Allai Nuaninunei disa fosa fe, mae manea emadu tonana mani metitua wesa akawuru wo, ambori mewartawanai weo etaunau na Nuaninu Mirarebana nei ne mambiriufo

ete bireri e. ² Ambori mewaitawanaifa we mano etaunau na Allai Nuaninufoi ne mambiriu fosa ne mani, mewaitawanai na finina: Mandoni dino yoa deyo, “Yesus Kristusi da na Allai weinontarai batang to nunei ma,” mani wenani medu na Allai Nuaninufoi ne mambiriufoi. ³ Wape mandoni dino wiwo yoa we Yesusi da na Allai weinontarai batang to nunei ma kaha mani, wenani wiwo medu na Allai Nuaninufoi ne mambiriufo kaha, mae medu na Saminseni, mano weaiteta we Kristusi, ne mambiriufo. Metaramioaifa we nuaninu kerira nani ambori da ma ki, tuti ninaia mani niyai kawuru na nunei ampa.

⁴ Wape arikang enehuwawu mea wa meaine, mea mani Allai ne arikang di mea tuti meharai kobusa, metau wesa kaha, weo Nuaninu Mirarebanaio niyai na mea wai, wemambiriu sewa nuaninu kerira niyai na nu finina. ⁵ Mano etaunau fi mai kaha fosa mani, nunei ne inontarai saine, ampefe emadu kariri aunauo nunei tuti inontarai nunesa etaramiosa fo. ⁶ Wape tata mani Allai ne arikang di tata, tuti mandoni dino deroanso Allai mani, tarao tata. Mae mandoni dino wiwo Allai ne arikang dine kaha mani, wiwo tarao tane kaiwone kaha. Na tonana ne, tatitua nayai we tawaitawanai we kaiwo emadura fo na Nuaninu Mirarebana nei tuti wetarai, ete nano nuaninu kerira foi.

Taenemiwawu wawera tata weo Allai mani mano enewawu biriu dine, tuti enewawu tata paria

⁷ Maniwowirio enehuwawu mea wa meaine, mera ma taenemiwawu wawera tata, weo Allai andino dohong tata taenemiwawu tonana ne, tuti taenemiwawune mani na Allai ma. Mandoni dino

enewawu mani kasau ampa we Allai yiwang en-
erorongfoia weworu tuti deroanso Allai. ⁸ Mae
mandoni dino enewawu kaha mani, deroanso
Allai kaha, weo Allai mani mano enewawu biriu
dine. ⁹ Na fininaifa aino Allai deinawiai we tata
kariri todoni enewawu tata ne, amani demi ne
Kaisung mansiari foi to nunei meu we mireha we
tata, ambori tasobu numainufo riati. ¹⁰ Na ton-
inane tawaitawang kariri todoni taenemiwawu
tarai fo, amani wiro tataino tenemiwawu Allai ne
kaha mae, Allai dino enewawu tata ne donio demi
ne Kaisungfoi meu we dohong ne taraifo mireha
we tata, ambori Allai deiai tane sasarinei kiai.

¹¹ Maniwowirio enehuwawu mea wa meaine,
tawatioaifa we Allai enewawu tata paria, ampefe
tata toyarine taenemiwawu wawera tata. ¹² Wiro
manei deti Allai kaha rai, tonanai ki wape taen-
emiwawu tatane mani, Allai weboyari ria tata
tuti enewawufo masi na tata, nana mani taenemi-
wawu kariri ne dawiafo.

¹³ Tawaitawanai weo taweboyari ria Allai tuti
Allai weboyari ria tata, weo dohong Nuaninu
Mirarebana fi we tata ampa fefe. ¹⁴ Tuti man-
taung amea amewatioai terai tuti amewuwuaifa
we kaiwasanei we Dai demi ne Kaisungfoi ma
we weMananu Mampariri we feriri nunei kiai.
¹⁵ Ampafe mandoni dino yoa deyo, “Yesusi mani
Allai ne Kaisung dine,” nana mani Allai weboyari
riati, tuti i kontai weboyari ria Allai. ¹⁶ Ampafe
tawaitawanai tuti taroasoai we Allai enewawu
tata.

Allai mani mano enewawu biriu dine. Inon-
tarai mano enewawu inontarai siai foi mani we-
boyari ria Allai tuti Allai weboyari riati. ¹⁷ Tuti

taenemiwawu wawera tata na mai ne tarai to-yari Allai enewawu tata fo, ampefe na rahida ambori kiutu kaiwo we tata fo, tamatai kaha tuti tamamaya kaha we tatoari na arongreafo, weo na nunei mani taenemiwawu na mai kariri i we enewawu fo. ¹⁸ Mandoni dino enewawu inontarai siai mani, wiwo mitai we sobu aiboi ria Allai kaha. Amani mano enewawu inontarai siai ne tarai kariri Allai enewawuti, wiwo mitai we sobu aiboi ria Allai ahang kaha, weo deitawanai dohong kariri Allai ne dawiafo ampa, amani enewawu inontarai siai. Wape inontaraio mitai sobu aiboi ria Allai mani, kasau ampa we wenani wiwo enewawu inontarai siai kaha.

¹⁹ Taenemiwawu Allai tutu taenemiwawu wawera tata, weo Allai dino enewawu tata fafong ne. ²⁰ Masino manei medu deyo, “Yau mani enehuwawu Allai,” wape enerireu ne doroifo, wenani mani inontarai pempamu dine. Weo mandoni dino wiwo enewawu ne doroio deti teri foi kaha, nana mani todoni deyo enewawu Allaio detioi kaha foi nina? ²¹ Ampafe kaiwo Allai dohonai we tatohong kariria finina: Mandoni dino enewawu Allai mani, todoni kontaio enewawu ne doroifo.

5

Taroasoa Yesusi Kristusi ne dirasaya fi nunei

¹ Mandoni dino yoasoai we Yesusi mani Mananu Mampariri Allai dereri fi dine, wenani Allai yiwang enerorongfoia weworu. Tuti mandoni dino enewawu Dai Allai mani enewawu ne doroifosa kontai. Weo ea mani wawafoi ne

ariking saine kontai. ² Ampafe taenemiwawu Allai finanai tuti tatohong kariri ne kaiwo pondoia fo. Na tonanane tawaitawanai we taenemiwawu Allai ne arikangnesa finanai. ³ Weo taenemiwawu we Allai finina, nana mani tatohong kariri ne kaiwo pondoia fo. Tuti ne Kaiwofo wiwo maraba we tata we tatohong kaririai kaha, ⁴ weo Allai ne arikangne tata mani, tawemambiriu we taharai kobu fi kerira na nufi nini kiai. Tawemambiriu tonanai na tane taroasofo. ⁵ Mandoni dino wemambiriu we kirai kobu nunei rai e? Mano biriu we niari tonana nei mani, manta inontarai yoasoai we Yesusi mani Allai ne Kaisung dine.

Kaiwo rabuang botoruo deinawiai we Yesus Kristusi mani Allai ne Kaisung dine

⁶ Allai ne Kaisungno da to nunei ma nei mani, Yesusi mano we Mananu Kristusi dine. Da ma sobu baptisifo na mereha, tuti mireha na aitabafoi, ne rika tiwowu we tata. Ampafe wiwo sobu baptisifo tera kaha, mae ne rika tiwowu we feriri tata nai kontai. Finanai Nuaninu Mirarebana nei medurai we antu tarai, tuti Nuaninu Mirarebana nei mani tetofa kaha, mae medu te fi tarai fo. ⁷⁻⁸ Fi betoruo itomadu kariri Yesusi ne mani, Allai Nuaninu Mirarebana nei, Mereha webaptisi nai nei, tuti ne Rikao tiwowu nai foi.* Fi nanai itorainawi ruhiai weo Yesus Kristusi mani Allai ne Kaisung dine. ⁹ Fianai aino

* **5:7-8** Tarahai ne maksuti tonina: 1. Fi Nuaninu Mirarebana foi deinawiai we tata kariri Yesusi na kaiwo medurai we tata na taenemirorongnei. 2. Kaiwo Allai medura fo na rahida Yesusi sobu baptisi fo, tuti, 3. Fio kawariai tuti fi wewaifo medurai kariri Yesusi na ne mararehafoi tuti rahida suwi aha fo.

inontaraine emadura fo taroasoai, wape fianai aino Allai medura fo wemambiriu sewa finanai. Ampafe todoni kontai taroaso ne kaiwo medura fo kariri ne Kaisungfoi. ¹⁰ Ampafe mandoni dino yoaso Allai ne Kaisungfoi mani, yoa we kaiwo kariri Yesusi nanai na enerorongfoi. Wape mandoni dino yoaso Allai kaha mani, wenani medu toyari deyo Allai pempamu, weo wiwo yoaso kaiwo Allai medurai kariri ne Kaisungno Yesus Kristusifo kaha fefe. ¹¹ Tuti ne kaiwo medura fo ainina: amani Allai dohongno numainufo we tata kawuru ampa. Tuti ne Kaisungfoi andi dohong numainu nanai we tata ne. ¹² Mandoni dino sobu Allai ne Kaisungfoi mani, sobu numainufo. Mae mandoni dino sobu ne Kaisungfoi kaha mani, sobu numainufo kaha.

Taroasoai we Yesus Kristusi mani Allai ne Kaisung dine, nana mani taminohi wenumainu rai

¹³ Itoi kaiwone we mea, mano meroasoai we Yesus Kristusi mani Allai ne Kaisung dine, ambori mewaitawanai we mesobu numainufo ampa.

¹⁴ Tawaitawanai paria we tatutang Allai fo mani, fiani kontai aino tatutani weai kariri ne dawiafo mani, taraoai. ¹⁵ Tuti masino tawaitawanaifa we tarao tata na fianai aino tatutani wea fo mani, tawaitawanai kontai we finanai dohonai kontarai.

¹⁶ Masino mewati tane doroi inontarai Kristeni manei niari sasari, wape sasari nani wiwo sasario wedayari sobu numainufo kaha foi, nana mani metutang tuti inontarai nani we Allai, ambori daraberahi weru ne sararifo tuti sobu numainufo riati. Fininai we mano enari sasario

wiro wedaya numainufo nai werusa kaha fosa. Wape sasarifei wedaya obu numainufo kahi kontai. Manei niari sasari maraba nani mani wiro yeretawang mea we metutang tutiri we Allai kaha. ¹⁷ Fi sarawai kiaio tanariri ne mani, sasari dine. Wape na sasari nanai kiai, weai wiro wedaya rawanang adia foi kaha.

¹⁸ Tawaitawanai weo mandoni dino Allai yiwang enerorongfoia weworu mani, wiro niari sasari pampang kaha, weo i dewawuti ampafe Saminseni wemambiriu we niari fi karira wei kaha. ¹⁹ Tawaitawanai weo nunei sentenang sawai to Saminseni ne mambiriufo, wape tawaitawanai we Allai ne arikang di tata ampa. ²⁰ Tawaitawanai kontai we Allai ne Kaisungfoi da kawuru to nunei ma tuti dohong awai we tata kawuru ampa, ambori tataroanso Allai mano wetarai foi. Tuti taweboyari ria mano wetarai nani tuti taweboyari kontai ria ne Kaisungno Yesus Kristusi. Yesus Kristusi nini faini dino Allai taraifoi dine tuti andi dohong numainufo we inontaraine tata ne.

²¹ Arikang enehuwawu mea wa meaine, mehatai weru omi we aririwangno inontarai eroasoa kaha fosa esomi weai we ene sengwa.

Sempaisi Ne Kaiwo Mirarebanai New Testament in Ambai

copyright © 2010 Wycliffe Bible Translators, Inc.

Language: Ambai

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ambai

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

a4b461f1-cd72-5074-9be0-b39efea15ceb